



落落齋遺集目錄卷六

西臺書牘

中

孫老師

阮圓海

楊蘧初公祖

張篤棊

曾二雲公祖

宋鹿遊

周綿貞公祖

蔣澤壘

錢牧齋

門人朱子潔

沈雲升

魏廓園

李緝敬

許約疎

毛禹門

蔣澤壘

徐若谷

夏緘菴

王洪崖

魏元白

錢梅谷

孫六吉

周綿貞公祖

吳石渠

宋一衷

楊蜀亭

周綿貞公祖

張燦衡公祖

蔣澤壘

曹薇垣

趙芝庭

詹翀南

胡泰六

饒業明

門人饒得渭

王中認

劉泰望

吳本如

吳亦臨

瞿芝遠

蔡季來母舅

申青門

申玄渚

陸衷涵

陸足吾

白惠風

楊大豫

鮑上海

何武莪

金稠原

楊大豫

陸鳳台

楊蘧初公祖

沈雲升

田陸海

周老師

又

程徵源

樊鐘陽

萬拙菴

卓嘉定

鄒靜長

陸景鄴

張燦衡公祖

董見龍

李緝敬

李若鶴

劉康谷

程肖莪

李大衡

吳茲勉

王玄珠

門人余未之

寇禮亭

何大瀛

黃行其

董景越

梁樹宇

王玄珠

趙

饒業明

晏玄洲

朱上愚

楊兵馬

孫

林二府

一 儲文曙

沈愚公

宋文希

畢白陽

王葱嶽

祁西岩

閔非臺

申玄潛

徐未狹

練任鴻

徐月賓公祖

余星子

周來玉

傅元軒

孫咸若

葉震孩

吳玄垣

張澹若

宋一衷

胡浮冶

落落齋遺集目錄卷六 終

落落齋遺集卷六

江陰李應昇仲達著

男遜之輯

西臺書牘 中

上孫老師

歲底伏蒙批答諄至教思藹狀如坐春風明月
中神動心開又如聚米爲山谷規畫指授率狀
有嘗山首尾之勢也老師以動天格祖之血誠

旋乾轉坤之謨略用奇化正握機入微乃至蒙
犯雪霜夜宿毳幕生聚教訓旺氣遂滿關山直
美狡■於股掌之上韓稚圭之膽詎方此也以
遼人守遼土以遼土養遼人千古不易至論彼
中情恇怯者視關外爲畏途併抑掄此鹽煤之
利此固智士所笑狀三鎮獨無一出而每煩元
老之親行者謂何中朝士大夫席萬間之蔭矢
偏見之談大率左祖關撫者好驚風鶴致疑

撫者實畏戈矛各各蘊隆於中不覺以仰望之
殷憂思之過今幸和盤托出兩者皆去羣情各
安其故衆喙遂息其鳴春防帖狀頌聲交作老
師至是直無異同之可計何毀譽之可言某嘗
竊聞諸君子之意迴維於十年之前所以皈依
宗盟者不啻元祐之相司馬故按疏一出交口
非之匪某門牆之私言也老師身繫衆正之望
如山之有泰岱星之有北辰片言袞鉞國是

所定知不忍因人而併疑其地因小羣而併渙
其大羣近傳新督時蒙褒獎士大夫欣欣相告
謂休休有容收羣策羣力之雅念如此也不識
兩新撫亦足供鞭策否人有言王帥柔靡貴家
輕華子弟時咯血數口老師亦弗之器也果爾
何不易置之乎進取之議咸願靜以待時狀何
以長握必勝之算而不以歲歲五百萬罷敵天
下之民人人挾省兵省餉之私望不知其難言
之也老師幸略教之某愚昧無所適從但以嘔
吐肝膈爲弟子事師之道狀不知關事甚愧于
君子惟老師俯鑒幸甚

與阮圓海

數年契濶纔得聚首掀髯稍談天下事而天人
不偶遽見拂衣人情挑伺之故蓋有甚難言之
將不知何所究竟者年兄浩狀不顧旣已留挽
不得無可奈何惟願靜思深念早迴入山之車

則天下事尚可爲也情界圓缺多關定命明心
了眼珍重此身五鼓夢中不及折柳以此數語
聊附古人臨別贈言之義

與楊遽初公祖

京口一別台顏忽九閱月矣老公祖冰心道味
凝狀如山沛狀如雨四方魚驚獸駭而下土波
臣書偃耕隴暮歌靜食霜露之餘而不驚其故
信有道者治術之微而大也弟矢口橫臆不足

爲吾黨之重老公祖幸指我所未曾使得奉爲
南車大發而長鳴之貴鄉新銓固當事者求材
豫章多收梗楠桐梓之思狀謀之弗協諸君子
微有介介魯齋有云自家人說自家話一言破
挑者之陰狀彼此直諒大見參商今起華匪石
俱行矣微情苦口曲而調之化吾黨異同之嫌
毋蹈不遠之鑒老公祖倘有意乎蔽邑凋敝纔
受廉仁父母之賜而遽奪之議從何生也惋嘆

不已仕者將謂邑實病令望而裹足老公祖何
以爲計倘有可調之以來須相其敏力察其品
骨今不審誰爲之署即如遼餉年年輸將而叅
罰率不及格奸胥作祟何法驅除倘復來兩舊
丞之類則邑化爲鼠窟矣吳公祖南遷日費分
疏亦敝郡人士一阨也家大人時蒙矚眄感勒
於心家兄弟遂擯孫山當是一日之短家弟病
魔未去不敢重煩提挈獨家兄文心學力尚不

後人仰望老公祖之力全而注之沉舟破釜當
有以報弟越在三千里旣邀天之幸老公祖以
骨肉道誼炤臨於鄉而使矻矻之苦志觀光無
路老公祖必引爲子弟一體之責當無俟弟之
控陳矣

與張篤棊

老公祖鬱狀之望如水映鏡空見者冷狀心善
也貴鄉屬有參商銓席虛左借重老公祖提衡

人倫之鑿竊幾幾望之昨自一函報謝遂澗疎
至今朕神未嘗不依法星之耀也家兄某薄
有脫穎之地久沐國士之知而錄考見遺大負
提挈將沉舟破釜以得一當老公祖既不棄之
藥籠應不吝其神力某於三千里外獨此懸懸
則委曲多方必致之棘關者尤不朽之啣勒也
手足關心汗顏布瀆

與曾二雲公祖

弟迂疎自率不識治譜朕妄謂神靜者誠必學
源清者明必遠魍魅畢炤之謂才魚鳥不驚之
謂德俗吏馳騫腐史牽拘皆非負也老公祖淵
朕澹朕而凝以如山之力四國載寧一之休羣
魔息飛揚之焰凡我父老子弟頌聲日來一時
仁明公祖交相與以躋至治也顧司理遷不副
望不知誰何中傷乃邑父母且遭投杼蜚語過
南誰爲爲之孰令聽之不覺爲下土恫焉老公

祖定悉本末願開其蒙顧念爾時落落晨星署
且莫借彼耳食者以下土爲悔地則柰何敝邑
之民瘁矣日供騷役之不暇而竭土之毛剗心
之肉大半爲胥鼠所咽幸新緒方清卒又已矣
署者再一擾之未卜所究竟老公祖幸時懸之
心目庶不終痼乎試事娓娓陳瀆宿昔友生誼
無可已不暇顧言之行否朕憐才佳事援手非
難老公祖勿視爲尋嘗竿瀆而愍寘之幸甚

答宋鹿遊

諱祖舜淮安守

淮海重地蛟龍所居民貧而易動也妖俠乘釁
鼓浪翻風具有隱憂在幸借老年文壯猷坐鎮
惠澤効敷銷窺伺之雄心返哀鳴之鴻雁東南
半壁咸受安瀾之賜焉催科撫字昔人所難調
甘劑苦仁人必有仁術局外者蒿目而憂真不
知所計區區管見惟有緩舊逋以勸終事老年
丈以爲朕乎附懇敝同門丘義軒年兄竟作古

人言之堪慟其年伯在堂有子雖青其衿而孱
不任事老年丈幸垂情覆露破格提携之吾輩
年誼應於死者篤厚想老年丈有同心也

答周綿貞公祖

托在宇下獲有桑麻雞犬之安旣已如天之覆
矣典刑在望正氣嘗伸稍得竊春秋袞鉞之餘
一抆狂瞽狀岐中之岐忽有發於意想之外者
水火旣形羣邪窺伺老公祖聞之得無有隱憂

乎噹焰方張內外交結魚肉我下土之殘黎老

公祖爲民請命天聽難回則吾民之厄也可

柰何第願徼福星之炤雨暘時若枹鼓不驚父

老子弟安枕而卧則剜肉醫瘡無所復恨惟是

舊逋至踰五年理勢誠難兼督調甘劑苦地方

爲政權宜而畫一布之以絕胥吏漁獵之端飲

德未有涯也老公祖倘不廢芻蕘之采乎敝邑

廉令忽以議奪今誰爲署之奸胥窟穴侵蠹萬

方積漸以往將不可問乘劉父母清緒而早調
一精明英敏之才以急治之庶猶可救老公祖
留意地方知無俟某瑣瑣也

答蔣澤壘

年兄行後自圓海入一變爲疑城自圓海行又
一變爲敵國初以工垣之推生圓海之疑繼以
臨川之難各致疑於圓海弟虛中觀之二者皆
過也臨川謂雲中也自是一種意見恐不關於

圓海圓海夫亦豈忍至此特鄉匪石調而魯齋
帖月吾輩人也乃憤憤生疑漸不可解中細人
之挑激至使兩正人無端蒙其毒聞墻召侮豈
不可爲痛哭哉今羣議解紛未知解得與否而
事端將自此開矣王安二字又殺一人一人不
足計恐夢在世道柄在中涓禍在縉紳漸不知
所止耳如此景象安能脫狀如年兄驅省方之
轍哉福清去志頗決高邑側目者衆坐席未穩

僉堂且行矣所幸寮中諸君子風氣不墜尚可
撐持如與貴座師相聞幸力以轉移調劑之責
屬之若江右二三正人反覆不已則先進者不
得不任其責也

答錢牧齋

官府隔絕惟有講筵一脉稍通真呼吸非具學
識才辨精誠膽力者不能收格心之益以此望
翁臺之入爲世道計甚大非一人私言也邇來

同志分曹玄黃已見太阿倒授將有清流白馬
之憂幸孫老師甚膺天眷入關可期而居中
幹旋尤亟亟于翁臺是望東山之屐幸勿久淹
若向來持議之人聞已虛中無我不必墨念也
不肖拙鈍駑下不能爲吾黨絲毫損益舌短心
長面墻是嘆倘翁臺進而教之或終不至貿貿
耳拜命之辱跂足以俟

答門人朱子潔

武侯云學須靜也才須學也澹泊可以明志寧
靜可以致遠每誦斯言輒爲神悚古今豪傑不
能出此數言僕根器淺薄學力不到意於靜淡
二字守爲涉世居心之本而塵務相關失其故
我筆舌交迫迷却真銓忽接芳訊知築室靜修
隔遠城市頓發起予之嘆嘗謂才士之致可以
剽名文人之心可以學道以兄之才之年之文
譽而高謝時趨晤歌一室何論文章吾以觀道

力矣勉思此意守而勿失竊因下問題齋額曰
靜遠愧不能大書聊以塞責簡讀妙義知心清
而機靈風格道上無些子脂膩之氣更願挈其
大提其脈勁而正和而澤之清心所入自有
真境非他人所可告語也

答沈雲升

向聞茶差爲僂羨年兄之僂僂也曾幾何時而
風波鼎沸對面如山人多鬼蜮之心步有荆榛

之掛然後想僊不獨茶差凡乘驄而出超狀於
是非之外者皆僊也弟不得年兄之靜而習爲
懶不得年兄之徹而師其心方且束首新差尚
有數月不得去勢必至顛蹟而後已孫老師聞
有進意雖中外尚有異同然可翹足俟也總之
都中之議日變月化不可預設成局只看秋夏
之交恐變態尚未止此年兄靜觀之餘何以教
我併爲吾黨計乎

與魏廓園

吾輩疏亦復如此不必言矣今萬一可爲者在
九卿大臣之疏而太宰且杜門求去安得戶部
有韓文爲之倡率耶此時言去不謂避言乃送
於避事事已如此三十年重名須有結畢之地
年兄素以道義爲太宰所重此事須一激發即
言之不行事君愛友各盡其道而已年兄以爲
何如幸密商之弟目小苦故不得即面晤偶閱

劉瑾時事蹙狀而起以告知已過三日即無益
矣

答李緝敬

纔拜鹽筴之教又奉激揚之牘民之劑苦分甘
吏之拂肝洗膽儘覺學道者仁術自妙而信心
中搔癢都靈台臺之割寸丹以灑秦晉之墟者
孜孜不厭如此弟坐困長安車塵泡影每披對
大疏一字輒意赧心飛也法星西去正論孤

翹首鷺洲空餘神往

答許約疎

老父母高懷曠致當於清風明月中置品憶往
歲在清涼坐上識領光霽則亦時以清涼意境
想像鳴琴之韻不意民有清歌朝施墨錮吳
山吳水應笑廉吏之去亦聊以去後口碑明敝
鄉之民心尚在也意者清固造品亦違世法乎
論久自定謹伸舌以俟榮分布被之絲謹效締

裕之報庶幾我思古人之義不敢煩稱以溷大雅

與毛禹門

昨忽聞太夫人之憂慘朕動色即擬走數行弔問朕猶妄意事機可圖環召不遠且曲商善覲以得一當不意大璫旣持於內福清又期期於外即太宰一片熱腸不得不觀望慎重乃小人交通大難先作同文有獄直道不行邵上葵之

流毒再發而後憤兵交起今日之事不至二正之季不已者弟將駕山中之車從仁兄後矣若使天牖聖明大奸鋤去則吾黨可以吐氣而仁兄蹕冠之日也朕向者之毒發之漸猶可言也今發之江右謂之何哉仁兄虛明冷覷何道而可要之弟亦過計矣即霞城恐亦在餽飢間未知作何結局辱仁兄惠存發此憤懣洽寰諸君子皆行矣世道否泰真聽之天無足言者素絲

一縷伏惟筦置

與蔣澤壘

前字奉報想已入覽嗣後互相觀望彼此調停
意求少靜不意髮鉗亡命等語出而佐鬪兼內
禍日深卒不可解激爲相等之勢於是副堂之
疏一出公論爲之一鬯彼中甚忙即陳居恭且
出疏以叅璫而他可知也總之事機旣發要地
絕無有應手照顧之人年兄試觀邸報與一切

旨意槩可知事之究竟必至二正之季再見
於今日耳又何言乎時事如此可憂甚大局守
長安如在船艙中一聽風波搖蕩狀後想持斧
乘驄之快也黔撫出疏自辨而不發抄近霞城
於齊中諸公手覓得刻冊大是放恣狀匪石考
功覆疏已爲平情之語渠意亦倣年兄功過相
準之意有罪疑忌過等語似亦不必煩叅駁也
意於功罪大凡中帶一二句足矣年兄以爲何

如僉堂意欲行太宰更苦不肯留此局不知應如何收煞年兄可一言密教之

答徐若谷

上谷重鎮畿輔鎖鑰台臺以旋乾轉坤之手矻
狀爲萬里長城使碌碌書生安枕于此皆明賜
也卿雲在望鈴拆相聞廟堂之上風波滿眼
台臺憂心世道倘不吝一輦慈航渡之彼哂乎
貴鄉道德節義之風甲於天下不肖沐浴餘潤
依爲斗極豈特并州之念而已台臺收其夙尚
則幸有以教之

答夏緘菴

台望隆重早借分藩爲一路福星此當事者循
資采望本有同心不意淮海多故舊者復留再
三商權乃移江右總之以道德之鄉處第一流
人以竟從前第一等治行竊爲并州額手慶矣
家大人村居却掃特承惠問故人高誼銘佩不

忘狀此硜硜者實家大人之教也朝四暮三其
謂之何來賜謹以璧返統希宥其不恭但萬二
生極感鼎力昭雪鹿洞生光台名當與紫陽並
傳矣

答王洪崖

諱道元廣東副使

台臺洪猷亮節壁立千尋海內正人仰爲山斗
固非一二含沙之口能鼓浪而挑戈也嶺表重
地正借福星坐觀澄清之烈益懋建牙之望彼
人已斂翼而歸殆不煩過爲介意韓正老乃吾
輩正人且與家姑丈宿契俟其入時一解之不
敢負惓惓之託也

答魏元白

諱光緒山東按院

教殷殷世道之憂乃長安鼎沸而台臺蓬
萊閣上仙仙乎湧日吞濤令人慨狀有乘桴浮
海之想今而知人間險幻不在大海茫茫只此
陸地奇波漸成蟻穴方謂靜以消觀爨之熱腸

猛以清憑城之深窟而雷霆忽下狐鼠方驕折
檻無能掛冠有志獨恨不早得補浴之手探驪
珠而掃妖氛耳

與錢梅谷

向在南康有一府學訓導王之臣貴州人甚有
超狀意極於白鹿洞中禮重之後轉貴陽教授
十月圍城督諸生以死守乃圍未解而已劣轉
兩院雖敘薦以卑官寒冷莫爲昭雪頃其子亦

以明經應試持疏欲上曾爲達之貴衙門陳公
祖竟不之許但念今天下官爵冒濫功賞混淆
彼一老明經受圍城數月之苦能倡率青衿以
死守之義僅以循資之故使曳裾侯門真可憐
也此種情事似與妄自陳乞者不同台翁倘可
爲一言使達天聽乎想仁人君子有同心也

答孫六吉

恭惟老師以正法眼觀下界空華直提人心膽

於月鏡中魔障畢消狐禪始破塵飯土羹者更
覺無處生活此亦敝鄉一變至道之時也從來
公與明相須而文與法自合精氣所通神明爲
動况於握槩磨烟之士乎績望峻卓榮膺特簡
不得久借麟鳳之章狀數十年間敝鄉有棟梓
之遺則皆誦明德於無窮也某硜硜爲性直於
邪正消長之關茫乎未有所窺聊復狗臆妄言
耳今震霆時擊狐鼠日驕內外之變隱憂方大
拭望老師還朝展補浴之手作中流之柱國
是世道何幸如之瞻戀宮墻不勝耿耿同氣之
懷未敢以私瀆也

答周綿貞公祖

異同之言發於吾黨流波激電遂張中涓之焰
所謂楊墨慘於洪水信哉言也中外旣已分曹
是非從此始定小人之網或未易張也今發難
者去矣化異爲同似乎有機安得且晚聽履聲

之人使紛狀者望斗極而止其所乎惟台臺教
之不敢不竭駑力以從

答吳石渠

年文品力吾黨托寄甚深非直爲一時華要而
已當事者別有宿心持之堅確故不遂所願狀
留居瑣闥出大手眼以驅邪指佞尤世道大幸
也爲期不遠努力前修若時事尚可支撐不遂
掛冠以去猶可俟飛鳥於長安傾倒數年心也

耳

與宋一衷

諱師襄

年臺持斧而出澄清畿輔且舊遊之地吏弊民
情可炤燭數計也乃中朝議論忽復紛紛而
雷霆震驚豸冠走歿可爲班行短氣年臺聞之
得毋拍案而起乎井陘道王君弟與共事江右
甚知其才品如玉之粹者也年臺留意拂拭之
砥柱旣移吾黨遂無領袖言念近事惟有軫鬱

答楊蜀亭

諱金通丹徒令

敝鄉得歲愷悌君子多辱而臨之狀屈指卓魯
未有不首推老父母爲東南半壁之冠者驚濤
屢作正見安瀾非老父母妙運深心不知張皇
幾許若經緯之緒冰玉之標固非贊嘆之所能
盡也山公坐上拭目以需不盡種種

答周綿貞公祖

敝鄉凋殘已甚十室九空蓋不俟水旱爲虐而

皮骨將枯矣幸邀仁人之賜甫脫呻吟漸有起
色乃生之不辰造物者復沼而魚之引手而援
是在老公祖惠澤從心再見富鄭公之芳規耳
賑未敢望蠲亦須爭若停舊逋以母爲民擾則
老公祖可以便宜行也擬俟勘報公言請命狀
不如老公祖之一言九鼎伏讀大疏所謂仁人
之言其利溥哉有焚香以祝耳

答張燦衡公祖

弟習爲外吏每謂官評長短惟地方知之最真
故不敢以耳食之見短長外吏若碧山劉公祖
之議蓋先得此心之所同狀者也前雲間之舉
本以士民之意而貽累賢郡守以行蓋垣言其
所聞老公祖言其所見公論昭狀老公祖何嫌
何讓遽思棄敝鄉而拂衣乎覆疏蓋屢促之祇
以太宰杜門百事擔閣咨已隨到隨復今部覆
已奉明旨矣以部遲非本衙門遲也老公祖

持斧澄清敝鄉方有雲開月朗之色即報滿期
迫何妨請寬且敝郡五邑三缺其令所藉於老
公祖之釐剔者以日爲歲萬勿孤雲霓之望也
水災再告民且爲魚仁人君子惻狀動念知不
俟詞之畢矣

與蔣澤壘

月初即草數行奉訊未得便發一閣遂二十日
可見長安之混也狀時事亦不出所料今萬元

白奄奄一息生歿未卜林心弘之逃大爲衙門
短氣昨士光亦杖發矣了此一案全是太宰之
力雲中已下外艱大抵從此可以靜矣魯齋帖
月爲茂明所轉都有化異爲同之機亦世道之
幸僉堂纔可留而副堂又有必去之勢若留得
太宰則可爲也終日騎馬而待漏則坐於松棚
聞諸璫方以武廟實錄進則禍未知所終殊
生掛冠之想年兄何以教之

與曹薇垣

諱文衡

年兄以絕頂精神做出絕頂好官龔黃卓魯復
見今日移地易民不過朞月可以分藩前者加
銜之議不敢力爲贊決者吾輩但討一分便宜
便有媒孽者居其後孫恭甫年兄所以被此者
亦以加銜爲之祟也功多賞薄乃有餘思年兄
以爲朕乎長安光景大抵是二正之季士大夫
之憂未已即社稷之憂也方發掛冠之思年

兄何以教我

答趙芝庭

諱胤昌曲周令

側聞老年丈妙手運斤清心茹蘗胸有成竹目
無全牛畿南卓異之聲無不首為屈指者夫今
之令亦難矣催科則病民撫字則病官急操之
似於釣奇緩繩之易以滋蔓使安焉習焉雨濡
風蕩而不詭不驚者此真治術之妙也老年丈
殆近之矣既為第一等令自有第一等官公論

自在翹首俟之

答詹神南

諱應鵬嘉興守

嘉禾為浙西重地非深心大力未易妙入人心
老年丈淵狀止水挺狀孤幹恢恢遊刃定有不
言而使人意消者下車未幾先念故交遠馳翰
貺見之欲汗也弟拙疎自信碌碌如人已覺鼠
技之窮空灑杞憂之淚老年丈何以教我乎不

粵東答胡泰六

粵東之變紀綱掃地 國家二百餘年未有亂
民披猖一至此極者豈特一方之慮實關天下
之憂自非老公祖文武壯猷剛柔妙運定亂于
呼吸之際決機于緩急之間則禍不知其所終
矣二千石自失民心持斧之憲臣何罪彼中士
大夫自有公論 廟堂之上自有處分總之紀
綱爲重義不得姑息亂民而始禍有因亦不容
混淆 國法讀大疏再四情法曲盡似無以易

之矣

答饒業明

諱景暉廣東審司

地方之變固云意外狀釀禍有本縉紳之自不
可諱也握兵者追其罰而甸宣者分其咎是豈
情理之平不佞竊効一言云身在內而閉戶不
納是爲畏禍身在外而開門揖盜寧無後憂今
臺下焦頭爛額矣又何罪焉以風紀之故而苛
於共事之人要終不能倒翻公論也敝衙門行

有持平之議臺下亦且靜俟之耳契濶之懷實
增惋嘆矢竭區區不敢斬也
答門人饒得涓
緬維高韻與日俱長發久闕之光以生故人之
色蓋屈指計之獨未曉文心道味竿頭之步去
阿蒙幾許以此耿耿耳粵事大爲駭人波及尊
公尤爲悵恨情事曲折昭昭耳目掩面入心者
固不能以一言操功罪之衡正自無煩過慮主

持公議者應且有說耳長安如沸璫禍不減於
亂民僕方履虎尾而想掛冠不審得燒燭以待
良友之至否先期就道神靜心閒亦戰必勝之
道也倘有意乎

答王中詔

諱永吉定興令

每從薦剡中想見芳標清韻超朕治譜之外其
自驛車來者又無不口頌仁風燁燁聲光梓里
生色幸以立水抽繭之意懋勉前途吾輩有一

片血誠入赤子腹中則神明鑒之豈有不能動物之理托在同心固無敢不竭也

答劉泰望

諱斯陳海澄

猶憶明衡年兄在銓署時問其將來之秀於老年丈首屈一指弟每藏之膈間明衡非妄語者也老年丈芳聲卓政有口共芬今居波斯在藏此亦吾輩亭亭獨上之地海上之民習於污政一沃以清風孰不冷然入心也仰惟勤勤下問

此爲芹味可以共享老年丈定爲發一笑也

答吳本如

都下囂靜閒忙一視兩關爲動息台臺仗鉞臨邊風雲在心■索在手■銷跳梁之威■寢潛窺之志如韓范偉望河陽壁壘自應不同乃其大者尤在輯和文武捐除畛域每敝座師從關上書來輒嘆服台臺淵妙沉雄不啻口出而撫臺規畫之方率受鹽梅之劑是又在台臺善治

而成之夫封疆大計最患參商遼左淪亡此爲
病本不肖愚迂無似狀從不敢妄談遼事自謂
多指亂視故矢不犯此一段罪業顧管中窺測
每欲以此言相告台臺深心神力廣益集思尤
喜聞蕩蕘之說者也辱忝通誼故敢布之

答吳亦臨

猶憶途次一晤芝眉至今耿耿於懷也年文卓
識孤標珠圓玉映而久淹墨綬兩地琴清書最
之方新則峻擢之在邇所謂觸邪持正朗朗日
星之章固年文事也弟庸庸何堪當此乎有翹
首以望飛鳥之入長安耳

答瞿芝逵

大府劇地才足以運力足以擔精神足以周徹
而又有矯矯自異兢兢恐墜之念以提之則愈
劇愈見利器耳年文具此數者與運斤成風何
異况以計典爲言何其謙抑之至也念省會重

地如可題留亦屬便計萬不必以此中爲念
答蔡孝來母舅

長安捱日每喜家訊之多而輒懶於作家訊時
一舉眼即想見母舅蕭狀之趨狀通候之墮落
落乃爾亦恃有迹外之鑿而已於青門年兄函
中啓得手教爲之快狀福祉盈門他無所念衣
食之計水到渠成即俯首而思亦未得其方小
事尚爾况欲高談天下大計哉邇來走馬漸慣

獨苦舌不能結乞婦之想旦夕不忘母舅何以
教之玄老偶有人言昨已爲之曲致狀千秋公
論不必以口舌爭也現聞何以久不來館閣中
纍纍橫金腰玉而麾湛持於丘壑世道大略可
見吾鄉水災光景定惡有救荒之策亦望示之
可以入告也家訊一函乞爲發去聊通平安二
字而已

答申青門

向有報函已悉別來欵曲適接手教又如晤對
一番亦旅况蕭然中大快事也今伯年翁沉識
雄才共倚爲封疆之重啓事已駸駸上矣微聞
有關門之危爲擬議者而言者忽出殊爲惋嘆
以目前用人之故彈及九原論定之相業弟尚
未諳往案一讀令伯大疏如曠斯啓千秋公論
自在詎足爲令伯累乎病目口授不盡耿耿惟
年兄亮之

答申玄潛

邊疆纍卵急需旋轉之才老年翁沉雄淵妙
米爲山谷使人躍躍有尺組繫天驕之想乃明
綸甫下旁議忽生凡在知交之末共深多口之
嘆悠悠煩語不足爲老年翁白璧瑕第索及三
十年前金滕之案則九原有知寧無太息甚矣
議者之苛也伏讀大疏瞭若指掌急向敝同咨
鳳毛年兄婉致此意渠已首肯却不意鄒瀘老

之有言狀總不出此數言之外老年翁第靜聽
之所謂不辨自明者也千秋青史一代人心要
豈以目前筆舌爲據辱大教之及敢布縷縷

答陸衷涵

長安聚首悠悠可思機緣偶阻仙旆南還殊令
吾黨有索寞之恨狀璫焰方飛縉紳短氣吳山
吳水一年逍遙天之所以厚年兄者甚至不須
羨秃筆招殃也太宰方欲破格用人遂不能安

其坐今格外所增暫爲新選君出之地也年
兄青鎖鳴珂正好穩夢但預辦數篇大文章爲
整頓乾坤計耳申玄老忽掛多口殊是意外狀
總屬前人舊案不足爲累也一函幸不浮沉何
當爲行李之累偷兒眼小覷此空函豈求書真
抵萬金乎一笑

答陸足吾

年丈行後正氣遂衰一切人國計民瘼俱無人

得其要領吾鄉落落兩三人尤覺孤弱不能與
秦晉齊楚爭盟若何武老之再造危疆功存
國本僅得平平一轉而吾輩已覺力竭氣盡矣
此亦孤弱一徵也年丈早早着鞭事更有大於
此者宮府參商仁賢浩歎豈年丈優游松菊時
乎弟鼠技方窮白雲在眼不知能坐候使節之
人否

答白惠風

諱貽清

縮綬黃堂風行千里自是吾輩實在經濟事業
等而上之猶屬隔膜不親况如弟空言無裨安
所當萬一乎張弛寬猛之間斟酌布之而毋護
恣睢蠅營之吏於下二千石之責盡此矣台丈
妙手精心宿有高譽知新政卓冠兩河欣爲梓
里生色若區區郵使小誤五實年兄自不作此
俗見也承命即爲致之不煩介意

答楊大豫

諱方盛河南按院

長安聚首正賴同心之雅今年丈持斧南巡地
居四方之中央則澄清一方即所以又安天下
固不獨兩河拜賜已也但吾黨落落又見玄黃
之血每思脫離此地而羈局不了遙望驄馬之
行觀風問俗不啻仙境至地方治狀自無逃於
水鏡中弟夢夢不善鈎索實范狀無以答下問
之雅若此中近事只大家求靜耳看吾黨福運
何如年丈高明之見幸有以教我彰德白守敝
府之卓狀者也幸炤拂之

答鮑上海

老父母治行卓絕有口能言有心共曉無俟不
佞之微塵濺沫裨益高深也理人之方甘苦自
知與民之分甘茹苦者知之區區芻蕘乃蒙俯
采尤非其質狀以見仁人君子孜孜求瘼之心
矣巨浸稽天吳民其魚老父母德政所感海若
效靈聞瘡痍未如往歲果何道以致此

答何武我
台臺正氣膚功昭垂雲日迴翔兩粵共有嘽嘽
之懷狀內之坐嘯晝諾所謂虛名便計從來大
經濟之手率以鎮撫一方歷年久長乃得盡展
謨猷建不朽之業且達觀世局欲速其功每爲
小人藉口惟君子退守一步則人心轉有餘思
正氣亦覺綿遠台臺之暫留甘棠舊蔭也萬未
宜動東山之思使不知者以爲介介也肝膈之

私敢効他山台臺其俯鑒之伏讀加派疏冊爲
民造命爲國奠本使今日有十五人心台臺
之心而彷彿良泐美意以行於天下何至騷遍
窮黎此固不肖之所神仰而舌甘者也何敢愛
焉

答金稠原

諱世俊

清風朗月輒深玄度之思每念世趨凌夷人心
波蕩銓政幾於濫觴道宜受之以節乃可以通

其窮而疏其壅狀乞者或未滿志焉山公座上
清通簡要如翁臺者指不敢多屈而以些小同
儕之事茹蘖不吐飄狀高謝不獨明厚亦將砥
世也相知每共嘆此義引領羽儀之出在旦暮
間耳弟孤拙無所短長心之所存不能畢述何
意耿耿者辱鑒信於千里之外耶

答楊大豫

代函纔報俄接嗣音弟於諸兄弟中最為拙而
孤懶而廢其何以承下問勤勤如此狀弟於中
土治狀實未有聞從此當時時博訪以備芻蕘
之采苟有所聞不敢不密以奉告也邇來議論
少似靜平不復爭水火玄黃矣此番舉動所傳
聞者多出意外狀不關吾黨相知則亦付之度
外而衙門變態沓出又有孫堂翁之變真可浩
嘆也貴屬推知治行卓絕而風格不凡者鑑衡
定有別得可舉其名見示否餘無足為年兄道

弟亦十有五六杜門不出總無好光景也但望
文場監臨如雲中絳仙耳而風聲不共昔

景仰有年矣宦途修阻無緣識荆敷歷之偉望

諱完學福建布政

峻卓之芳聲私計粉榆光耀建牙之指者實惟
翁臺是賴邇者八閩奠安紅夷底定則經緯之
績居多雖計前啓事方議暫停而公論所推要
當超乘或需次撫閩或先陟卿寺當事者正有

商量自不敢後駑力也伏讀條教露湛霜明

國計民生可謂要言不煩矣以此實心實力仔

肩天下大計何事不立何蠹不清仰窺淵妙之

藏必有燭炤於四方之故者其亦可傾儲而教

之乎

答楊蘧初公祖

向有一函馳候想已徹覽近聞巨浸稽天民且
為魚所恃仁人德政活我災黎此中正竭綿力

共爭改折其絜急要着全在按臺公祖勘疏幸
老公祖鼎力促之敝邑十有七潦近在炤臨之
下尤望破格爲民請命近武進議留即可以青
暘移之敝邑業與當事者言之未審得從所請
否長安變局日多弟以拙直貿貿而行殊愧無
所短長老公祖何譽之過也宇下之庇已弘而
遠益之以翰旣更令汗浹附有一絲爲獻亦野
人之芹也

答沈雲升

年兄行後吾輩遂覺孤寂又當內外水火之時
語嘿兩難官命如葉真使人望巡方使者如雲
中仙也執法除殘觀風問俗步步是實際事弟
正悔擔此虛差却於驚背混此歲月年兄何譽
之過也人情險巇議論亦淆正使浪息波平原
自天清日期年兄虛觀近事且謂之何其有可
以教我否靜長年兄治行旣已膾炙人口學道

自其本分容與意白年兄商之種種欲言筆不可殫

答田陸海

諱唯嘉浙直鹽院

老公祖正色昌言主持國是屢折璫餼不避撻鱗同志者方望爲領袖即邇來盈廷請劍猶是老公祖餘勁也何云不合時宜哉弟孤拙無似碌碌猶人老公祖以宿愛之故而過譽之愧矣愧矣敝鄉凋敝之後重以商羊爲祟民且爲魚

救亦不飽當事者按畝責賦欲舉從前救災成例一切寢格恐洵洵思亂吳越間將無寧字老公祖握兩地之命脉爲民造福端有厚望仁人一言百世之利也楊蘧初公祖端嚴敏靜吏弊民生洞無遺炤今譽望日重遷期不遠尤乞老公祖爲地方借寇完此救荒大政倘有意乎辱承手翰故敢率布

答周老師

久無便羽遂隔冬秋近從俞令親拜雲中之札
併悉吉履及太師母襄事之期正擬杼辭作輓
一申門下士私念忽枉台命屬以傳信之言其
不敏以館飭小業受國士知而今腕膈間積塵
落暈且忘之矣况號爲古文辭尚未能絜字切
音顧欲執筆誅行哉伏讀懿略瞿然下拜實深
篤行先民有道仁人之想不獨景闡範而式聖
善也附塗歌巷嘆之後託姓名以不朽言即弗

文豈非快事要以機絲雲錦易蕪穢之言碧玉
文犀飾瓦礫之語師命則重愧拜何安至白毫
穎秀實分夢中之花庶幾向管中乞靈以不大
負明命未知筆神見許否耳

長安之局正在可解不可解之間一時意氣相
煎猜嫌互起總是聲望皎皎之君子各有獨登
壇玷之意而事會偶有參差人情又

使剖心立血之交情忽入深雲迷霧之變局即
圓海年兄一去雖有微情亦爲人誤今喜亂者
借以爲題好事者蔓傳之謗吾輩平平澹澹何
樂有此豈非氣運乘除君子亦有不能自主者
乎今波浪少平全局尚在所難言者 聖躬孤
翳特甚左右伏莽方深昔人謂參政他日之憂
也老師能終以度外置之乎葉相公怏怏而行
怨尤殊甚彼謂調停已苦而公論遺議紛狀要

其病根獨不釋朕於南昌波及禹門兄陰厄其
出機會屢失可爲嘆恨老師且幸秘之某向出
口見憎不知何緣獲戾若復言此又增一重罪
案矣吾鄉水災正在力爭改折不審得從所請
否急候按臺勘疏老師幸着力言之爭十纔可
得五也台諭饒父母廉明爲一時冠已心識之
不敢不竭齒牙之力諸門生漸次出都今只寥
寥兩人林門生聲望甚佳老師時一提撕之則

他日同心之一助也時事日難頗切歸思老師

幸終教之

答程徵源 諱正巳保定巡撫

恭惟台臺皎若鏡懸淵如水止吏民之利病直

須坐炤兵食之單匱何難巧籌乃虛懷不居殷

殷下採夫罷餉留兵則此五千人者向豈有量

沙之術乎抑別有醫瘡之法也財盡則議銷兵

烽急又思抹馬多與去寧有擇焉權緩急之勢

而謀分合之宜問疲冒之籍而簡精銳之旅蓋

書生勦見不過曰少勝多實勝虛耳局外何知

短長惟台臺精核而妙運之并求向者所以留

兵而罷餉之說也狂瞽曉曉以發高明一哂

答樊鍾陽 諱尚燦兩淮鹽院

今天下竭澤而漁賢愚共嘆似乎舍赤子之皮

毛遂無點金之妙手狀猶是鹺政而入年臺之

孽盡何處生此五萬之羨七萬之抵也天下事

不得實心實才以爲之其腐敗金粟而枯竭脂
髓可以數計乎從來經國名臣原無奇方神力
如此苦心如此通變如此先公後私則旣盡之
矣弟愚亦有心拙無所效捧讀大疏祇有額首
已耳

答萬拙菴

諱谷春吳縣令

老父母逸才慧炤幾於遊刃燃犀而氷操凜狀
勺水不飲此治民之所交口而頌者也方今災

沴頻仍民窮盜作朝端日見紛岐內外正當水
火民生國是端籍老父母入而主持之不佞碌
碌無奇心長舌短其何以答有道之譽祇有愧
汗沾衣耳

答卓嘉定

故鄉不辰遭此巨浸所賴仁人君子引手不啻
起白骨而肉之也伏讀台諭奔走污泥問饑煦
苦字字日煖春溫從此民不知災矣昔人謂救

荒無奇而程子謂一命之士苟存心利物於人
必有所濟通此意行之動念具有化工出手無
非生意未有心真力竭而澤不下暨者也老父
母聲聞卓狀德政不勝書偶推目前一端言之
耳

答鄒靜長

手教再及談甘州事如指掌即聚米爲山谷不
是過也邊疆之事如此使弟長一識矣擊璫之

局草草而敗幸得支延目前而側目者方深亦
聽之耳居此一官殆非計生死毀譽之日也

答陸景鄴

當今經世之才目之所見心之所許實無居台
臺之右每向相知擊節非敢佞也貴陽危地乃
大手轉旋脫穎而出之會頌豐功偉烈者將滿
天下又豈俟某之三寸舌哉台諭屯種鼓鑄悉
經濟實用根本先圖而歸於減以求精此一言

者尤救時急着居邊境者樂不肯言亦不肯爲
每念封疆之事難以臆決不敢浪置口語台臺
以一旅一卒定前人之案則成敗利鈍之數瞭
然矣內之所患者獨遠徵兵而多費餉餉固不
容已願寢徵兵之說耳蔡元老負天下之望台
臺同心戮力以成之銅柱之標某謹執簡以俟
大刻薄志名山不朽時一披誦以當塵玄并州
新態遂復爾爾台諭業心識之矣

答張燦衡公祖

敝鄉荒陋之區老公祖法星炤之朗朗乎耀於
光明之域矣洪水爲虐一望渺然漂廬沉竈之
景啼饑號寒之聲老公祖耳而目之繪鄭俠之
圖以獻而當事者以爲謾也行且加罪於鄉士
民弟某輩從此緘口矣仁人之言業心拜之庚
桑畏壘百世不敢忘老公祖也

答董見龍

諱應舉

兵興以來民力已竭當事者尚仰屋而歎每見
聖明一番發帑即滋一番盜騙從未有費省
而效多如台臺之屯政者台臺經緯之妙仔肩
之力實以謀國苦心拮据從事故荒郊變爲
沃土勸農即以養兵某實心快之不禁舌之津
津也豈足裨高深萬一乎屯事惟廣惟勤惟久
乃克底克國之績台臺尚堅忍行之以紓國
計之乏此第一根本計也台貺誼不敢自

外狀以新設之節有捉襟之勢一絲一粟皆在
區心節縮中何當捐俸以賜乎敬心佩之完璧
以返

答李緝敬

不肖謬謂差無仙凡視其居之者何如耳台臺
持真實心發大願力炤之以白日拂之以清風
吏洗其腸而民飫其味台教所謂行所無事則
真吾道之仙法也台臺心可自信而人亦無不

爲台臺信學術事功俱在不欺兩字中而獨一
方禔福哉不肖皈依有素正籍箴銘乃台臺將
以例讓其如同志乏主盟何
答李若鶴
慈邑宿稱劇地非運斤之才未易媿快也每聞
品望絕羣而上如百鍊精金浮圖合頂豈憂罌
風吹墮哉弟最以疎拙自信黽勉支吾所望爾
心早入正人生色耳

答劉康谷

近從德化令君便郵附有荒函奉候想已徹覽
矣老父母苦心苦味士民知之當事知之所不
知者一二含沙之口耳崇陰不改槐路方長終
當爲老父母白去後之思何況計典斷無吹毛
碎璧之理也老父母不須介意春風北上拂席
相俟彭澤酒錢不敢覩拜惟台慈炤察中氣爲

答程肖莪

諱紹河南撫院

恭惟台臺志在憂民道先濟世風雲變色樽俎
盡是甲兵雨露從心鴻雁皆歸樂土蓋中原爲
天下之命脉而台臺作四海之斗杓澤豈在于
一方功自關於社稷昨者進璽大疏獨著儆
戒之詞大破貢諛之習迨觀盈廷之諾諾益想
正臣之審審拱聽履聲以作柱石某空有愚忠
苦無佞舌方轉喉而觸諱輒望若以捫心何當
下問之殷更沐百朋之錫永懷明德可任瞻馳

答李大衡

諱思啓浙江按院

驄馬南行風清兩越每讀驅殘黜墨之章凜有
霜氣至憐惻民隱繪圖請命藹乎仁人之言也
台臺之造越者至矣早望還朝主持國是
將梓末徼有餘庇正恐孤踪已還無緣再領塵
玄耳

答吳茲勉

諱之甲浙江督學

老公祖文心慧炤迥在天際俯視凡界直懸肺

腑而獻之區區模索妍醜較量短長不足道也
以九十日盡兩越三試之秀如風行電過十不
失一方今相士之神不得不推老公祖第一矣
文衡所重教化攸關越士囂而陰術亦善變以
老公祖之陽明孤峻明表而微導之必有道術
入人之妙竊洗目以觀成不敢侈頌前美而已
某方慙直見憎勃有尊鱸之想吳山片石仰望
真人紫氣未知緣法若何猥辱高雅惓惓敬謝

大德并布依斗之私

答王玄珠

瘴地僻遠人所意厭而翁臺凝神畢慮以居之
霜月高懸夷民靜謐勞苦績奢詎他方可擬矧
孤忠環召久在馳驅人心未能嚙狀要以衆
正飄零之時尚有疾風勁草挺居天末則吾道
有人同里生色所望旦晚還一朝砥此狂瀾耳
何武老有五國本邊功抵餉三案方在推轂間

事忽中變正恐以敝郡爲累不知遲速何如葉
父母水清山立剝心愛民真一時首出斯民直
道與緇衣好德正自不能已已台教蓋先得我
心者逢人說項早已竭此寸舌矣弟孤踪踽踽
抽身無路每懷大雅何處晤言臨風悵惘

答門人余未之

每懷清晤夢在長松白鹿之間偶一杼眉談天
下事猶往日餘緒也何日北上潑茗煮雪助我

靈心浣我塵面乎勿久作兒女戀戀也近見賢
書故人寂寂毋乃爲彼哉所笑寄語諸兄宗風
未墜吾道不孤勉思進修以觀後效傳兄并道
耿耿

答寇禮亭

諱慎蘇州守

治敝郡者不難風馳雨驟難于霜明日皎要使
人恬于理俗息其囂各有恥浮薄而勉忠厚之
意則至治也老公祖居之以惇一臨之以清嚴

民風吏習肅朕丕變師帥之義洵無愧焉業已
書上上考恐不能久借寇君朕商羊肆虐之餘
兩粟無計轉漕益迫而織璫復挾其重以煎此
遺脂挺而走險亂可翹足待也老公祖調甘劑
苦莫難此時東南半壁之憂以累老公祖矣高
明何以計之

答何大瀛

諱應瑞

敝郡向借福星民飲其和熙熙如也士澤于道
彬彬如也觀於大射人有尚功尚德之思焉以
此知老公祖衡文之政中土丕變矣數十年後
猶將歌咏作人之澤况雲漢昭回之日乎不佞
一覲台光每懷大雅翰貺之辱敢不心佩

答黃行其

外吏之難非官于外者不知也李官之難非久
于李者不知也台丈以才以識當事者倚重尤
殷則其難定倍于弟朕難盡而易者至矣都中

落落遺集卷六
江海波濤倏忽百變弟力觸兇鋒遽蘆一官倘
未即掛冠猶能矢竭三寸舌以揚芳譽也

答董景越

粵雖僻壤狀西南夷動靜之咽脉也從來治民
多良吏而治夷者獨首班定遠寬猛操縱之間
非深心淵識誰能妙運况當此土酋跳梁滇黔
蜀騷敝之會乎台臺才而本之以誠識而濟之
以膽將安粵以安西南半壁反側者將望風稽

顙焉側聽鴻聲書之竹帛

答梁樹宇

諱建廷

年丈天駟異才瓊芝卓品黃堂奏最中土風清
昔漢詔二千石以政平訟理爲安民之要今民
之不安政之不平也况藩屏之地均調實難年
丈剛柔妙運爲民大父母寧復河南南陽之不
可問乎

答王玄珠

粵西僻在天末浚網濶疎聞猺獞蠢而頑狀畏
漢官法甚其不肖有司家奴胥吏雜出而蠶食
之若得廉吏則易安也台臺清霜所拂人人易
腸田泗且懾威帖息獨黔禍方始不免紛騷披
髮大費區畫耳何武老之遷聞非其志狀二三
同志者舌力止此將需次樞曹台臺晤間善慰
存之同鄉主盟寥落已甚日望台臺竣事而入
若嘉惠之及殊爲慙悚絮語陳謝亦附于同好
之意也

答趙

諱天錫

國計匱詘弘羊不勝烹也當此而言寬商幾于
塵飯土羹狀清其源釐其蠹仁人之手每有上
下兼利之法而地方苟撓則又在執持之力耳
年臺合數長以握籌人稱利津無國無虧額此
真救時妙才也無憂匱詘矣

答饒業明

台臺峻節弘猷馭歷中外鬱狀建牙之望矣粵
民不靖自有任其責者公論昭明飛波已息拂
袖還山介不可奪難進易退風操迥狀不佞嘗
謂行藏大節寧處其後可以留而去者不失爲
高標不可不去而留者不免爲戀位此一行也
公論所以益明而台望所以愈隆也出山之期
屈指計之矣

答晏玄洲

諱清

地方數厄洪水虐之而老父母造化之手拯之
沉淵仁心所喻民不知災雖卓譽久飛即在異
等之擢猶得徼半菽之靈造命災黎則真非望
之喜也改折一議費盡筆舌幾于坐爲罪案今
以全災徼浩蕩可少慰仁人如傷之思若敝
邑無天徒有向隅之泣耳國是紛紜顛望主
持豈弟父母每爲歌詠不置無俟台命也

答朱上愚

諱光祚河道總督

治兵治水宇宙間兩大事神聖之所經營豪傑之所馳騫盡此矣非有絕人之才入微之機則不可以得志矧禁旅媮詭未鼓氣衰而一經台臺整挈如李臨淮旌旗壁壘一新也以此偉略出而視河雖沉州潰堤勢方孔亟知河伯效靈不煩璧馬之沉矣黃流旣平措中原于衽席不肖輩俱可安枕沐如天之庇甚大當執筆以俟用紀明德

答楊兵馬

司城之難百倍外吏法易詭權易撓奸又不勝剔也終歲而璧無玷焉如臺下者指不再屈不佞即旁局乎狀廉聞精采時口芳譽若以守法爲忤俗則不忤俗庸能守法也歲計之役無煩介慮

答孫蘭畹

諱森

弟聞人多矣見吏才之敏妙脫手彈丸者莫年

翁若也在江以目在粵以耳兩地政績可謂入
于精微使人意動而精消惜郡司馬之擢未快
所期耳狀才局所恢運以深心而一根極于實
地則真無前之樂竊願拭目以觀超簡者也

答林二府

向有一函奉候并鳴感佩之懷承台教惓惓具
悉尊旨每念敝邑凋疲之極不勝科擾之煩譬
如久病嬰兒奪其父母啼號雖切漠無動念而

仁人君子從鄰舍來撫摩過于已出喘息漸蘇
方知有生之樂其如鄰翁之不得久處何也狀
敝鄉之民沐甘雨和風之賜從此支持綿力皆
戴德之年凡可爲老公祖效五袴之歌者家嚴
已命之不敢忘也

答儲文曙

諱顯祚

襄陽宿號劇郡兼以征兵轉餉之餘楚地驛騷
殆遍守土者倍費拮据即功令忽嚴而平定安

集哀鴻可念其未可以鷹鷂易鸞鳳也老年艾
茹藥爲味運斤成風卓狀治平第一至于以完
糧作欠額豈司帑之別那抑部冊之混亂乎當
事者知行法而不知核實錯謬種種每爲人笑
了不足以損吳公治行直別白之可矣

答沈愚公

諱匡濟

居高者難如水之心御劇者難迎刃之手兼此
兩長指不多屈台丈何其裕如也越俗好波而

聲光所在又往往交相凌軋錢塘固首邑將以
表率諸長令而弭其心目其難其慎倍于他邑
台丈得無深思而却顧乎民瘼國是端有厚
賴詎止榮施梓里竊願附古人諤諤之義也

答宋文希

老父母親民如子治虞如家幽隱之情朗狀畢
炤人盡托衽席之安也民之無天忽迴福曜豈
弟君子之歌方與琴水同韻某托在棠陰久沾

湛露瞻歎之懷實倍倫等與人之頌豈敢後焉
辱翰施遠及殊發其愧素絲附獻聊代生芻伏
惟節哀珍重

答畢白陽

諱自嚴

恭惟台臺文武壯猷勳勞懋著共仰中朝柱石
冠冕天曹屬以津門之鎖鑰無人榆關之轉輸
不易暫借斗望用展鴻謨從前虛耗之弊止因
兵冗而餉糜即今對症之方不過清兵以核餉

故欲省餉先練兵兵練而老弱者汰詭冒者清
若欲省兵又不如省將一將之費可以養無數
之兵台臺酌盈濟虛守經通變幾于點鐵量沙
之妙而九天九地之神幾足食足兵之全用則
未易仰窺淵涵萬一今茲額手以觀爲國家根
本得人慶又爲神京緩急有賴喜也台臺其終
懋之其迂愚無所知識獨有好德之思耿耿不
寐况辱在世譜之末乎拱聽履聲之入矣

答王葱嶽

諱洽浙江撫院

浙爲海內名藩山川之秀麗民物之豐阜從來
名公鉅卿康濟之區也台臺以千尋正氣萬斛
弘猷賜履于茲聿新治象乃不肖私竊計憂不
在民而在兵兵不盜而獷難馴民即盜而駭易
敗也台臺妙運從心樞機坐握無不入人心志
使之意動神消者方今宇內多故安危之計實
在方叔壯猷矧時情翻覆非深心定力如台臺
又誰爲主持以扶陽德而消黨禍哉

答祁西岩

諱逢吉

子瞻爲養生說曰安曰和養生之方通于治民
長令號民父母凡以安之而已故曰政在養人
夫心和氣和而民之和應之此循良之上理也
讀來教勞絲就緒漸覺安和只此二言已諛政
譜理煩御劇無非是物民之疾痛疴癢不勝調
如父母之心恬意盡拊摩赤子而不厭即理天

下可也何獨一邑哉循聲正茂前路方遙尚勉
終之以需峻擢將世道有寄梓末分光矣

答閔非臺

造物者因此一方民商羊爲虐而特予之仁人
以拯救之譬如赤子有慈母之依雖切膚之痛
不難去也崑之徼德于造物者厚矣老父母出
真實心爲地方造命撫如傷之民振久弛之法
遂使豪猾斂手士庶興歌餘波所潤敝邑如在
懷保豈獨弟分蘭譜之光逢人讚歎其何能已
若治術之妙雖欲再效千慮之一亦不過無倦
一言止矣老父母倘訝其饒舌乎

答申玄渚

時事多艱急才實甚老年翁深心卓識未竟其
施天之所篤忌者不能掩也矧牽引舊案時有
乘除固知多口之無傷而今已 溫綸特被則
特簡可指日待矣吾鄉寥落振起無人其分

老年翁之光者不既多乎不肖妄語弗戒行思
歸隱息黥補劓老年翁何以策之

答徐未狹

敝鄉方在水底而當事者視爲不竭之藏呼號
之聲當以嘻笑誰復有惻狀哀憐者乎老父母
出真實心爲地方造命哀此災黎至甘居催科
之拙夫今天下之所乏者非巧也吏愈巧而民
愈困地方何賴焉外謝其華而中殫其赤如慈
母于子疾痛之與分燥濕之與共惟拙故誠也
老父母勉操斯志即古循良上理何以加焉

命答練任鴻

諱國事巡漕

漕事日難費盡老公祖心血其冰之早合則天
也至敝鄉巨浸仰藉仁人拯援之力雖輸將竭
蹙調苦爲甘敢忘如天大德今幸台車咫尺矣
根本之憂內外交迫老公祖以爲民者爲國
何以挽回氣數而消朋黨之禍哉弟戇愚觸忌

耽耽在前亟思引避豐艸長林老公祖何以教我

答徐月賓公祖

民生不辰遭此巨浸而急粟者緩民聊以三分之一塞其啼呼耳老公祖下車幾何時昌言請命至再至三若父母之于子拯之沉溺之中即濡首不顧也仁人之言聞者隕涕民雖轉于溝壑死無所恨况徼從寬議折之旨哉

雷

震四出至以地方虎冠摧奪我賢撫從此織璫肆其虐賦斂吸其脂加以正官半缺署事者如秦越人之肥瘠敲剝以應功令春夏之交二麥無望饑民嗷嗷盜賊公行衙虎四出三吳之爲亂藪可翹足待也老公祖以一身獨有其重控所環繞于側調劑倍費苦心此誠一時之難以爲老公祖累柰何目前急着在得賢令大疏已及此矣倘可與喻老公祖商之上江小邑有年

青才練者爲敝邑造命乎切膚之計迫于望歲
惟台慈裁察
答余星子
斗大寒城久淹驥足門下了不生厭薄想畢竭
心力以治之即有瞿塘滌預得不化爲平瀾順
流哉勞苦已深賢聲久播無煩意外之慮也不
佞迂戇觸忌行圖友麋鹿之羣狀并州故人關
心自切可效齒牙者視機緣何若耳

答周來玉

璫燄方熾正氣孤危所賴翁臺領袖群賢生色
朝宁忽聞居廬之戚相知共爲黯然況辱在聲
氣之餘薰澤尤切者乎久無便郵闕焉生芻之
莫茲以水患剝膚上厯軫念情至語迫不減鄭
俠之圖也業與霞城年兄筆舌交爭改折已有
端緒卽主計者齟齬相難要之期於必得共此
一方有輕重無緩急只候勘疏一到惟力是視

耳議局忽新忽故忽靜忽蹶總如波浪層層翁
臺虛中觀之其何以教我素絲戔戔敢告尊先
翁靈凡伏惟炤入

答傅元軒

老公祖以折檻之忠奮請纓之志當黔危累卵
慷慨致身向使廟堂早借韓范豈至有大方之
敗哉事機旣誤急乃需才而老公祖冒險疾驅
危疆生色誅逆定變壁壘一新夫濟之以沉澁
之以算前撫一懦一莽皆前車也誅首惡而
其餘老公祖饒爲之矣翹首捷音以日爲歲

答孫咸若

高陽老師四令郎

纍臣之釋人各有心不敢言也人各有偏至之
心不能持平等之言也老師發所未發宜乎其
或駭焉然爲國守法存此議論可耳而別有心
者致煩其口見之每爲三歎叙防疏中固有人
所大不喜者老師略一叙及而人以為必用之

此其所以紛紛也然不知者十之三知者十之七且度外置之耳三年勞苦危疆晏然人情安則忘危書生舌長見短千古同然徐當自定但聞老師有進取之議似又宜慎重也有便郵乎弟將附一候問之牘幸示之大才偶屈甚爲快悵遇合有時正宜沉詣以需并此奉慰

答葉震孩

諱有聲福清令

每念年丈品望應在木天乃屈之簿書殊非其

格然天下國家之事盡在宰百里之中從此練習隨方遊刃入而慷慨言天下大政未有不親切有味鑿鑿可見施行者也閩中之頌政績者推爲一時翹楚同心之助日盼望之弟附兄弟之好竊分蘭臭自不敢後彈冠之誼也

答吳玄垣

諱尚默四川按院

蜀事難於始尤難於終也始如奕家劫勢着着緊殺其勝敗之數乃在收局一着失算此局全

輸矣奢酋狡伏我以靜勝以穩勝蓄力布謀惟
先惟密年臺沉毅之力定優爲之
察吏安民又無須贅矣

答張澹若

諱履端東鹿令

年兄聲實並茂俄當高議青瑣之班矣此遽廬
一宿乃爲拮据播遷支持版築只此一片真實
心天下事何所不可爲力持清議百折不回從
此預卜而他日姓字與雉堞俱高亦一不朽之
業也爾時上如貧家作苦安得餘粒及人大惠不已多乎

答宋一衷

年臺以清風白日炤臨一方墨吏解綬去矣懸
鏡之下心膽俱動豈復有怙而漏于網者而俟
旁觀之采摭也兩耳如塞無可以報獨廷議日
紛正氣雖旺而時有飄蕩吹激之患安得年臺
早至出鐵筆玉尺以定之哉

答胡浮冶

楓葉蕭蕭戍樓高處年仁兄談笑而淨胡氛禪

家以有以嗔喜作佛事者知指麾之下喜動三軍
生氣十倍矣仁兄得毋爲之一笑乎長安光景
日新日異真以杜門却掃爲上着耳每欲於攢
眉相向處更覓歡喜佛也白岳年兄聞尚滯蜀
中仲雪亦久無聞問矣報代之牘不敢復報相
思耿耿引睇宣雲

落落齋遺集卷六

終

